

嫁之夫。不言父字者。以繼母與親母有間耳。然既從之而嫁。則知孤幼難離。更無依託之處。雖繼母猶親母也。推而及之。自應分別有無大功親屬。以定服制。苟或凌虐役使。絕無恩義。縱同居。仍當別論。若自來不曾同居者。無服何疑。讀者體認焉。八母中嫡母。乃父之正妻。妾生子當服斬衰三年。庶子爲嫡母之父母兄弟姊妹小功。母死不服。繼母。謂父再娶之妻。斬衰三年。母爲子不杖期。若父死。繼母嫁而已從之。服杖期。

繼母出則無服。爲繼母兄弟姊妹小功。養母。謂自幼過房。并三歲以下遺棄者。斬衰三年。慈母。謂所生之母已死。父令別妾撫育者。斬衰三年。母爲子不杖期。嫁母。因父死改嫁。杖期。母報服不杖期。出母。謂親母被父所出。杖期。報服不杖期。庶母。謂父正妻之子。爲父生子。妾杖期。若所生之子。爲服斬衰三年。如嫡母在。亦不得盡三年也。乳母。謂父妾乳哺者。總麻之服也。

例分八字之義

釋曰。例分八字。乃制律之本義也。世傳謂之律母。能知其義。斯真善讀律者矣。以者。非真犯也。非真犯而情與真犯同。一如真犯之罪。罪之故曰以。准者。與真犯有間。用此准彼也。所犯情與事不同。而跡實相涉。算爲前項所犯。惟合其罪而不槩加其實。故曰准。皆者。槩也。齊而一之。無分別也。不行分別。惟槩一其罪而同之。故曰皆。各者。各從其類。義取乎別也。萬類不齊。流品各別。比類而觀。實同一致。故用各字以別之。其者。更端之詞也。承乎上文。爲之更端。而竟本條所未盡。則用其字以發揮之。及者。推而及之也。大約凡係人與事各有不同。而罪無分別者。則皆以及字聯屬之。卽者。顯明易見。不俟再計之意。若者。亦更端之詞。乃設爲以廣其義。雖意會乎上文。而事變無窮。欲更端以推廣之。連類以引伸之。則不得不設爲以竟其意。故曰若。此律母八字之義也。

六賊圖